

# Avantags d'üna scoula pitschna

Gian Michel Denoth instruischa a la Scoula libra, Suol

DAD AITA DERMONT-STUPAN / ANR

■ Daspö bundant 10 ons exista la Scoula libra a Scuol, l'unica scoula da Rudolf Steiner, ingio chi vain instrui eir rumantsch. Successur dal confundatur e magister Jürg Lippuner es l'indigen Gian Michel Denoth. L'on passà ha la Scoula libra da Scuol, ingio chi vain instrui tenor pedagogia da Rudolf Steiner pudü festivar seis giubileum da 10 ons. Grazcha a l'ingaschamaint idealistic da las persunas d'instrucziun, dals genituors e da simpatisants s'ha sviluppa in quista scoula ün concept da classas cumplexivas chi s'ha verificà. Brigitta Emmenegger e Jürg Lippuner sun stats ils magisters da classa tuot quists ons. Sco successur da Jürg Lippuner es tuornà Gian Michel Denoth in Engiadina. El ha blera experienza süin il chomp da l'antroposofia. Davo stüdis a Stuttgart ed a Dornach ha el instrui 15 ons in üna scoula da Steiner a Berna.

## Scoula bilingua rumantsch/tudais-ch?

Gian Michel Denoth es creschü sü a Scuol a Suotchà, per cas güst là ingio cha la chasa da la Scoula libra as rechatta hoz. «Quist lö m'ha dat forza e schlantsch per ir our'el muond e per realisar mes ideals. Uossa possa accompagnar als scolars süin lur via in meis lö d'origin», s'allegra il magister. Per el es



Movimaint corporal stà i'l center da la Scoula libra.

MAD

la sfida dad experimentar ils avantags d'üna scoula pitschna. «L'ambiant es quia fich famigliar ed ils uffants as saintan libers, sun pronts da s'ingaschar ed han gust d'imprender», disch el, e cuntiuna, «l'on passà han güst tschinch scolars gronds fini quia la scoula. Quai ha dat ün pa ün'otra dinamica. Eir cun la müdada da magisters haja per uschedir cumanzà üna nouva fasa.» Gian Mi-

chel Denoth less as stantar d'intensivar il rumantsch in scoula. Aint ils statuts es previs il böt da manar üna scoula bilingua rumantsch/tudais-cha. Quist böt nun ha fin uossa pudü gnir raggiunt. Pustüt sül s-chalin ot mancaiva adüna darcheu persunas d'instrucziun adattadas. «Per intant han ils uffants duos uras da rumantsch l'eivna. I'l rom da progets intensiv less eu provar plü e plü fich

d'integrar eir il rumantsch», es l'intenziun da Gian Michel Denoth

## «Traideschin» per rumantsch, cun corp ed orma

Tenor la pedagogia da Rudolf Steiner esa fich important cha'ls uffants imprenan la materia cun corp ed orma. «In quista direcziun va ün proget cun la quarta e tschinchavla classa: Ils uffants han zambergià s'vess lur chasperets per giovar l'istorgia da Traideschin. Il text es tradüt per rumantsch ed ils uffants til imprenan our dad oura. Els sun fich motivats ed imprenan per gronda part facilmaing», agiundscha el. Illas scoulas antroposofas vegna dat güst tant pais als roms creativs sco

als roms sco lingua e quint. Tipica per la pedagogia da Steiner es l'instrucziun in epoccas. Ils roms matematica, lingua, fisica, istorgia natürala ed oters vegnan instruits d'ürant epocas da trais fin quatter eivnas adüna las prümas uras a mamvagl. Uschea po l'uffant far experienzias intensivas cun il tema, e quai eir internamaing. Davo po quist tema posar ed as francar i'l suotconsciain. Plü tard vain la materia darcheu trattada e cumpletada in ün'otra fuorma. Ultra da tudais-ch e rumantsch vain instrui a partir da la prüma classa eir inglais e frances, però na tuot in üna giada, dimpersè in blocs ed ils prüms trais ons be a bocca. Ils uffants imprenan sainza squitsch da notas.

## Facts e figuras da la Scoula libra Scuol

La Scoula libra es l'unica scoula da Rudolf Steiner cun instrucziun rumantscha. Actualmaing frequaintan quella 16 scolares e scolars. Els vegnan da Scuol, Sent, Puntraschigna e Strada. La Scoula libra vain manada sco scoula da di, quai vuol dir, cun sporta da gianter ed ura da lezcha. Ultra da las persunas d'instrucziun da classa, Brigitta Emmenegger, 1.-4. classa e Gian Michel Denoth 5.-9. classa, instruischan *Vré Bertschinger*, orticultura, cuschinar; *Tom Rump*, disegnar,

pittüar e frances; *Valeria Bisaz-Stecher*, rumantsch; *Jackie Wagner*, inglais; *Jennifer Pfiffner*, manadra da la gruppa da gö Chüralla/Scolina libra integrada, imitaziun ed exaimpel ed *Annemieke Ludolphij*, lavuors manualas. Persunas d'instrucziun e genituors portan la scoula cumünaveilmaing. Ella vain finanzada da genituors, amis/as e fautuors/uras.

L'on da scoula 2010/2011 va a fin ils 25 da giun cun la producziun dal teater da chasperets «Traideschin».

# Bler spass cul pass da quist on

Il (s)pass da vacanzas 2011 es pront

DA FLURIN ANDRY / ANR

■ Per la 17avla jada organischan las commemoras da la Pro Juventute d'Engiadina Bassa il (s)pass da vacanzas. Ils cuors da l'on passà vaivan frequentà bundant 430 uffants. D'instà han ils uffants in Grischun set eivnas vacanzas da scoula. Che be far tuot quist temp?, as dumondan pel solit blers uffants. Per spordscher als uffants da Zernez fin Samignun occupaziun d'ürant las vacanzas da stà organischa la Pro Juventute (PJ) d'Engiadina Bassa daspö il principi dals ons 1990 da tuotta sorts cuors ed occurrenzias. «Quels cuors chi vegnan realisats d'ürant las prümas trais eivnas da lur vacanzas pon frequentar ils uffants da la prüma fin novavla classa», declera *Annursina Zini* da Sent. Ella es commembra da la cumischiun PJ districtuala. Insemel cun *Madlaina Hauser* da Ramosch, *Nesa Hugentobler* e *Flurina Jann* da Sent, *Tamara Arquint*, *Romana Röhrle* e *Christine Truog* da Scuol ed *Angelika Abderhalden* da Zernez organischa ella il «(s)pass da vacanzas».

## Cul sustegn dals cumüns d'Engiadina Bassa

Fingia in december han cumanzà las ot commemoras da la cumischiun a stübiar e ramassar ideas, che sort da cuorts chi pudessan spordscher d'ürant la prosma stà. «In schner ans vaina la prüma

jada inscuntradas e vain preschantà vicendaivelmaing nossas ideas e propostas», declera *Annursina Zini* il proceder, «lura vaina contactà als manaders dals cuors per sclerir ils detagls.» Sco i'ls ons avant hana guardà eir ingon da spordscher cuors ün pa in tuot ils cumüns da la regiun. Per ch'ellas possan spordscher minch'on darcheu blers differents cuors as sfadian las organisaturas dal (s)pass da vacanzas da tgnair bass ils cuorts: «Quai ans grataja eir grazcha als manaders dals cuors, ils blers d'els fan quai gratuitamaing o per predsch favuravel,

qua vaina fat adüna bunas experienzias», disch la chaschiera *Nesa Hugentobler*. Ils cuorts per la realisaziun dal (s)pass da vacanzas d'ürant las prümas trais eivnas da lügl importan sco ch'ella infuormescha var 10 000 francs: «Quels finanziaina cullas entradas da la vendita da marcas da la PJ sco eir cullas contribuziuns cha'ls cumüns da Samignun fin Zernez ans mettan a disposiziun.» Las contribuziuns cha'ls uffants pajan per frequentar ils cuors sun be modestas, la taxa per ün cuor importa minimalmaing set francs.

## Il prim di davo las vacanzas da primavaira

Eir quist on han ils uffants üna gronda schelta dad in tuot 78 cuors, da zambriar, cuschinar, far musica e far sport. Qua be ün pèr pacs exaimpels: In Samignun vain realisada suot la direcziun dal silvicultur *Andri Arquint* la 12avla olimpiada da god dal (s)pass da vacanzas. A Vnà pon ils partecipants dal cuor dad *Iris Riatsch* scuvrir la tecnica d'aquarel ed a Sent passar insemel cun *Madlaina Nogger* sü Flüs ün di cun chavals, vachas, cugnigs e giallinas e davo durmir aint il

strom. A Scuol as lascharan ils juniors fascinar da l'apicultur *Peder Sem* pels aviöls. A Tarasp maina *Jon Fanzun* als uffants tras il chastè. *Tumasch à Porta* fa culs partecipants üna gita sül vadret da Morteratsch. A Samedan pon ils uffants interessats far la visita a la Rega ed a Cuaira a Radio e la Televisiun Rumantscha. Per cha'ls uffants hajan minchün listess bler temp da s'annunzchar pels cuors survegnan els il (s)pass da vacanzas tuots al listess mumaint, nempe adüna il prim di da scoula davo las vacanzas da primavaira.



L'on passà vaiva il (s)pass da vacanzas organisà üna visita al parc da suas a Sur En.

FOTO A. ZINI

## Cul sustegn dal trafic public

Il problem dal transport dals uffants fin als differents lös dals cuors güdan a schoglier eir ingon darcheu la Viefier retica e l'AutoDaPosta grischun: Ils uffants chi frequaintan ün o plüs dals cuors survegnan ün abunamaint general chi vala per tuot las vacanzas da stà. Quist abunamaint güdan a finanziar la PJ e l'Uffizi chantunal per trafic public, da maniera chi resta als uffants be ün import dad ot francs.

reclama

Öffnungszeiten:  
Mo - Fr 8.30 - 19.00 Uhr  
Fr 8.30 - 21.00 Uhr  
Sa 8.00 - 17.00 Uhr

# pizol-shopping

pizolcenter

pizolpark

65 shops

1200 P

mels/sargans

www.pizol-shopping.ch